

# TE HEHEURAA API

»»»»»  
FEBUARE 1940

## TE MAU API NO TE RAAU ORA TE VAU O TE API

○ TE hoê fifi rahi no te mau mana'o imi, tei hinaaro ia ite i te parau mau o te evanelia, o te hi'oraa ia o te huru mouraa o te mau taata nei. Ua papu roa te faa-iteraahia mai, i roto i te mau parau mo'a atoa, aita'tu e i'oa i horoahia mai i raro a'e i te ra'i e ora'i te taata, maori râ te i'oa o Iesu Mesia. Ua faaite-atoa-hia e, *Ia ore te taata ia fanau i te pape e te varua, e ore oia e ô i roto i te basileia o te Atua ra.*

Ua rave rahi te milioni o te taata tei pohe a'enei mai te faaroo ore i te i'oa o Iesu Mesia, e a ore râ, tei ore i noaa ia ratou te tia ia fanau faahou. E te tupu nei te uiraa e, ua moe anei te reira mau varua? Mai te mea e, e parau mau, e mea maitai anei te Atua o te Bibilia? No reira te tupu faahou nei te uiraa, Mai te mea te vai noa râ te ao nei i roto i te hape no te hoê taima roa, e o te Ekalesia a Iesu Mesia i te Feia Mo'a i te Mau Mahana Hopea Nei ana'e te Ekalesia mau, eaha'tura te hopea o te mau ui tei parau e, e Cherisetiano ratou, tei ora e tei pohe i roto i te mau tenetere i mua a'e i te moeraa o te evanelia, e te Autahu'araa e to ratou faaho'i-raahia mai i teie nei tau hopea?

Te tupu nei te fifi no te papu-ore-noa-raa o te mau mana'o i nia i te ravea ora, e na roto i te mau haapiiraa hape a te mau orometua haavare. Te parau nei te *Cherisetiano mau* e, ua faataahia te huru o te taata i to'na poheraa; e haere te mau varua i te ao ra e a ore râ i hade; e aita e ravea no te tauiraa i to ratou huru. Te faaho'i nei te maramarama o te mau heheuraa apî i te poiri i muri e te hohora nei oia i te ravea hanahana no to te taata faaoraraa i roto i to'na taotoraa, e e noaa i te varua i haamaramaramahia te upootiaraa o te parau-tia ma te mauruuru, na roto i te horoaraahia i te mau maitai o te evanelia i ô atu i to tatou oraraa tino nei.



No te aha i horoahia'i te ravea ia noaa te ite e te mana ia faaroo i te parau mau, i te mau taata e ora nei i roto i te tino ana'e? Te vai ra paha te mana'o e, ia faarue te varua mure ore i to'na tiahapa repo nei, ua hunahia i roto i te repo, e te tino tahuti noa, to'na mana ia faaroo, ia feruri, ia farii e ia patoi i te parau mau e te haavare, to'na auraroraa e a ore râ to'na orureraa i te mau ture no te ra'i? Ua faahapa te reira mana'o i te mau tiaturiraa atoa o te oraraa tei tae mai i roto i te aau o te taata na roto i te mau parau no te evanelia. E te faahapa atoa ra te reira i te mau parau mo'a. Aita roa te hoê vahi, i roto i te mau parau mo'a, tei faatia i te reira huru mana'o. Ua faaite o Paulo e, e haavahia te mau taata atoa mai te au i te evanelia ta'na i a'o atu. Mai te mea e, e parau mau te reira, e e mea parau-tia te Atua, eita anei e tia i te mau taata atoa ia faaroo i te evanelia, e ia farii e a ore râ, i te patoiraa'tu i te reira? E mai te mea aita te reira tiamâ i horoahia ia ratou a vai ai i roto i te tino nei, eita anei e tia ia horoahia te reira ia ratou ia taa ê ratou i te tino nei?

Ua faaite o Petero e, e haava te Fatu *i te feia e ora nei e tei pohe atoa hoi e ua parau faahou oia I parau-atoa-hia'tu ai hoi te evanelia i te feia i pohe ra, i faahapahia'tu ai ratou o te taata i te tino ra, te ora râ ratou i te Atua i te Varua.* Ua faahiti oia i te reira parau ei tuatiraa i ta'na tuatapaparaa i te ohipa e te tere o Iesu, o ta'na i parau e, *I taparahi-pohe-mau-hia oia i te tino ra, i faaorahia râ e te Varua; o ta'na ia i a'o atu i te mau varua e vai i roto i te tapearaa i teie nei.*

Te faaite maira te reira mau parau i te mau haereraa o te Faaora i roto i te area o To'na poheraa i nia i te satauro e To'na tia-faahou-raa no roto mai i te menema ofai. I to'na faraa mai ia Maria i roto i te ô ra, i muri a'e i to'na tia-faahou-raa, ua parau atura oia, *aore â vau i tae i nia i tau Metua ra.* I roto i tera na mahana e toru ra, a vai ai to'na tino i roto i te menema, te rave noa ra Oia i te ohipa ta to'na Metua i faaue ia'na. Te a'o râ Oia i *te ora i te mau tîti e te iriti ra oia i te uputa o te tapearaa no te feia i tapeahia ra.*

Ua faaite atoa o Petero e, a vai ai taua mau varua i roto i te tino *ua faaroo ore ratou \* a faaineinehia'i te pahi i te tau no Noa.* Ua poro-haere-atoa-hia te evanelia i te feia i pohe ra ia tia ia noaa ia ratou te ravea ia haavahia ratou mai te feia e ora nei, oia hoi, i te evanelia hoê.

Te raveraa o te faaroo o te hoê ia ohipa o te varua o te taata, e ua na reira atoa no te tatarahapa. Na te reira e aratai i te faaroo e na te faaroo e aratai i te fariiraa i te Atua.



E mea pohe te tino ia taa-ê te varua e eita e tia ia'na ia faaroo, ia tatarahapa e ia haapao, area râ te varua ma te tino ore, e mea ora ia, e e tia ia'na ia haapao i to'na mau mana atoa tei faatanohia no te ao ta'na e parahi ra. E mea na roto i te tautururaa o te tino e tia'i i te varua ia fâfâ, ia tama-ta, ia faatere e a ore râ ia faaterehia oia e te mau mea no te pae tino nei. No reira te tufaa o te evanelia tei haapaohia no te pae tino nei e ore roa ia e au no tei taa ê i te tino nei. Area râ e tia ia ratou ia haapii e ia auraro i te mau ture atoa no te pae varua e ia ora ratou *mai te au i te Atua i roto i te Varua ra*. E tia ia ratou ia faaroo i te evanelia, no te mea ua a'o o Iesu Mesia i te reira i te mau varua e rave rahi; e tia ia ratou ia faaroo, no te mea aita oia i poro i te tiamâraa ia ratou, ua *aratai râ oia i te mau tîti*, e e mea tia hoi ia ia tatarahapa ratou e ia fariihia ratou e te Atua. Ua parau te hoê metua no te ekalesia no nia i te Faaora i taparahihia ra, *Ua haere oia i roto ia hade, oia ana'e, e ua haere mai oia i rapae ma te tiaa rahi i muri ia'na*.

Te faaroo ra te mau ati Iuda, i te tau no te Mesia ra, te vai ra na tufaa e piti i roto i te ao varua—te Paradaiso e o Hade. E haere te feia maitatai i roto i te tufaa matamua, e te feia ino i roto i te piti. Ua parau atura Iesu i te taata eiâ i nia i te satauro ra, *Ei paradaiso ia oe e o vau atoa i teie nei â mahana*. E ere ia te reira i te parahiraa o te Atua, o te parahiraa râ o te mau varua i reva'tu e e tia i ratou i reira e tae noa'tu i te tia-faahou-raa. E vahi no te haapiiraa e no te faaineineraa, no te hau, no te oaoa e te haereraa i mua i te îraa mau. E i roto i te parahiraa o te parau-tia ua aratai atu o Iesu i te mau varua no Hade tei tamâhia e tei a'ohia i roto i to ratou tapearaahia, o tei faaroo ore i roto i te tino nei i te tau no Noa, area, ua faaoromai i te ati no to ratou orureraa, e tei farii oaoa i te evanelia na roto i ta'na raveraa a vai ai ratou i roto i te varua.

E ia tae te tau mau o te Fatu, e faaroo te mau taata atoa tei parahi i nia i te fenua nei, i te mau tau atoa, oia hoi, te ati Iuda, te Etene e te Cherisetiano, te parau oaoa no te evanelia mure ore te a'ohia e te mau taata tei maitihia e tei faataahia, e e noaa ia ratou te ravea no te tatarahapa, e te faafaiteraa. Area, eita roa e tia i te mau varua ia farii i te mau oro'a tei faataahia no te pae tino nei; no te pae tino ratou e ia ravehia iho â i roto i te tino nei, e tia'i.

*Papahia e C. W. Penros, te hoê Aposetolo*

*Faaauhia e: reo Tahiti e K. R. Stevens*

*Peresideni Misioni*



## EDITORIALE

## UA HINAARO OUTOU IA'U RA

**I** TE taime Iesu i anihia'i i te uiraa e, "E te Fatu, aita matou i ite i tena na vahi ta oe e haere na; eaha hoi matou e ite ai i te e'a?" o ta'na tatara-papu-maitai-roaraa ia i te ravea no tatou na roto i te faaite-poto-raa e: "Ua hinaaro outou ia'u ra, e haapao i ta'u parau." Ioane 14:15. No reira, "Eaha te faufaa, e au mau taeae, ia parau mai te hoê e, e faaroo to'na, e aore a'na e ohipa, e ora anei oia i te faaroo?" Iakobo 2:14.

"Te itoitō na anei outou i te faaroo i te ora na'na ra, Tei hamani ia outou? Te hi'o atea'tu na anei outou ma te mata faaroo, e te ite atu na anei outou i teie tino pohe noa nei i te faatiaraahia ei tino pohe ore, e teie nei tino tahuti noa hoi i te faatiaraahia ei tino tahuti ore, e i te tiaraa i mua i te Atua ia haavahia i ta te mau ohipa i ravehia ra i te tino pohe noa nei? Te mana'o na anei outou i roto ia outou iho e, ua tia ia outou ia haavare i te Fatu, e tae ai taua mahana ra, a parau atu ai e, E te Fatu, o te mea tia ta matou mau ohipa i rave i nia i te fenua ra, e e faaora ia oia ia outou i reira?"

"E aore râ, te hi'o atea na anei outou ia outou iho i te a-fairaaahia i mua i te haavaraa a te Atua ra ma te aau i i te haama, e te taiâ; ma te haamana'oraa i ta outou atoa ra mau hara; oia ia, ma te haamana'o-papu-raa i ta outou mau ohipa faufau, e te haamana'o-papu-raa e, i faarue noa'tu outou i te mau faaue a te Atua ra.

"Te ui atu nei au ia outou na e, e tia anei ia outou ia hi'o noa'tu i nia i te Atua ma te aau maitai e te rima mâ i taua mahana ra? Te ui atu nei au ia outou na e, e tia anei ia outou ia hi'o noa'tu i nia, ma te hohoa o te Atua i ootihia i nia i to outou ra mata? E te ui atu nei au ia outou na e, e tia anei ia outou ia tiaturi i te faaora raa-hia, i tuu na hoi outou ia outou iho ei tavini no te diabolō ra?"

"Te parau atu nei au ia outou na e, ei taua mahana ra e ite ai outou e, aore o outou e ora, e ore roa hoi te taata e ora, maori râ o te horoi i to'na ahu, e ua teatea; oia ia, e mea tia roa ia tamâhia, e ia horoi-ê-hia te mau huru porao atoa ra i te toto o to tei parauhia e to tatou mau metua, o te tae mai e faaora i teie nei feia i ta ratou mau hara." Alama 5:15-21.

Ia rave haapnai noa tatou i te maitai oi vai a'e te oraraa ia tatou nei e tia'i!



# TE PARAU AUTAHU'ARAA

NO TE AVA'E MATI

## TE MAU TAATA TUIROO O TE BIBILIA

- Mati 3. IESU E TO'NA TOROA. Mataio 16:20; 26:63; Mareko 8:29; 14:61; Luka 3:15; 9:20; 22:67; Ioane 1:20, 41; 3:28; 4:29; 5:1.
- Mati 10. TO IESU MAITIRAAHIA. I Petero 2:4, 7; Luka 23:35; Te Ohipa 4:27; Ioane 3:2.
- Mati 17. TA'NA OHIPA I OTI IA'NA. I Petero 2:1; I Ioane 1:7; 5:20; I Timoteo 1:15; 2:5; II Timoteo 2:10; Ephesia 5:2; Galatia 1:4; I Korinetia 15:20, 23; Hebera 13:12; 9:12; 1:2, 9; Apokulupo 12:11.
- Mati 24. E MANU'IA ANEI TATOU IA PEE TATOU IA'NA? Kolosa 2:10; 3:24; Te Ohipa 4:12; II Timoteo 2:10; Hebera 2:18; 5:9; 7:25; 9:12; I Ioane 1:1; 2:2; 4:9, 10; 5:11, 20; Roma 11:26; I Korinetia 1:24.
- Mati 31. A haapii atu i te parau no na Haapii Hahaere no te ava'e i mua, mai tei papaihia i roto i te ve'a no Mati.

## Na Te Mau Maapii Mahaere na te Mau Utuafare

### Te Faaturaraa

Ua haamo'ahia te Mahana Sabati e te Atua, ia riro ia ei mahana faaeearaa i ta tatou mau ohipa, e ei mahana haapiiraa evanelia. Ua faauehia tatou ia faatura i taua mahana mo'a ra. E nahea tatou i te faatura i te reira?

Ua parauhia i te hoê Amuiraa Rahi no te Ekalesia e, *Ia tomo tatou i roto i te fare pureraa, tei tomohia i te Atua, no te pureraa oro'a, te tomo atoa nei tatou i mua i te aro o to tatou Metua i te ao ra.* Ahiri i nehenehe ia tatou ia ite mata Ia'na, e mea papu e, ua faatura ia tatou i te fare pureraa. Noa'tu râ e, aita i nehenehe ia tatou ia ite mata Ia'na, ia faatura râ tatou Ia'na na roto i te faaturaraa i te fare pureraa e tia'i.

Ia hi'o tatou, i te tahi mau mearaa, e mana'o tatou e, te

A hi'o i te tuatiraa i te api 30



## TE SOTAIETE VAHINE TAUTURU

No teie matahiti, 1940, e haapii tatou i te parau no te mau taata tuiroo no roto mai i te Buka a Moromona.

No te Ava'e MATI

Irava tamau aau: Etera 4:19

E ao to'na tei itea ta'na haapao maitai i te mahana hopea ra, e faateitei-hia hoi oia ia parahi i te basileia i haapaohia no'na mai te tumu mai â o teie nei ao. E inaha, o vau ia tei parau i te reira, Amene.

*Mahana Maha (Matamua)*

Mahana iritiraa mana'o e te himene na te mau tuahine.

*Parau tumu na na tuahine kahaere: Ia Itoito.*

Ua parau atura Iesu ia'na, O te taata e tuu i te rima i nia i te arote a hi'o ai i muri, e ore ia e au i te basileia o te Atua. (Luka 9:62)

Te ohipa hopea e titauhia nei e te mau Feia Mo'a no te Mau Mahana Hopea Nei, o te ora mure ore ia mai tei parauhia e te aposetolo ra e Ioane: "Teie hoi te ora mure ore, ia ite ratou ia oe i te Atua mau ra, e ia Iesu i te Mesia i ta oe i tonono mai." (Ioane 17:3)

Te faaineine nei tatou ia tatou iho no te ora mure ore, mai te au i to tatou manuïaraa i rotopu i te mau taata êê na roto i te haaparareraa i te oaoa i roto i te oraraa o vetahi ê e te oraraa mai te au i te mau faaueraa o te Atua.

*Mahana Maha (Piti)*

*Te mau Feia Tuiroo no te Buka a Moromona*  
Iareda e to'na taeae.

1. Aita to ratou reo i faahuru-ê-hia. Etera 1:1, 33-43.
2. Te faaineineraa o te ati Iareda no to ratou tereraa. Etera 2:1-8, 14-25.

*Mahana Maha (Toru)*

1. Ua faaite o Iesu Mesia ia'na iho i te taeae o Iareda. Etera pene 3.
2. Ua faauehia te taeae o Iareda ia papai. Etera 4:1, 7, 19.
3. Te mau haereraa o te ati Iareda e te poheraa o Iareda e to'na taeae. Etera 6:1-4, 8-12, 29.

*Mahana Maha (Hopea)*

Mahana raveraa ohipa na te mau tuahine.



# TE HAAPIIRAA SABATI

No te Ava'e MATI

PUPU PARAIMERE

Irava tamau aau: *I Samuela 1:27*

I pure hoi au i teie nei tamaiti; e ua horoa mai Iehova i ta'u i ani atu ia'na ra.

Mati 3. Te tamaiti ra o Samuela. I Samuela 1:19-28.

Mati 10. Ta Iehova mau parau ia Samuela. I Samuela 3.

Mati 17. Ua topa Dagona i mua i te afata a Iehova. I Samuela 5.

Mati 24. A faaho'i i te afata a Iehova. I Samuela 6.

Mati 31. Hi'opoaraa.

PUPU PITI

Irava tamau aau: *Genese 22:17*

E haamaitai rahi roa vau ia oe na, e faarahi au i to huaai; mai te fetia o te ra'i ra, e mai te one tahatai ra: e e noaa te uputa oire o to ratou mau enemi i to oe ra huaai.

Mati 3. Enoha o tei haapao maitai. Genese 5:21-24.

Mati 10. Noa e to'na pahi. Genese 6:9-22; 7; 8.

Mati 17. Aberahama—te metua tane no vetahi mau nunaa. Genese 12; 18.

Mati 24. Aberahama—e taata tei tamatahia. Genese 22.

Mati 31. Hi'opoaraa.

PUPU TORU e te MAHA

Irava tamau aau: *Genese 8:21*

E ore roa te fenua e ino faahou ia'u, i te taata nei; ino noâ te mana'o o to te taata aau mai to'na tamariiriraa mai â; e ore hoi au e tairi faahou i te mau mea ora atoa, mai ta'u i rave iho nei.

Mati 3. Kaina raua o Abela e to raua peapea. Genese 4:1-16.

Mati 10. Enoha, te tamaiti tamaroa o Iareda. Genese 5:18-23; Hebera 11:5.

Mati 17. Noa e te diluvi. Genese 5:18-29; 6:8-13, 17-22; 7.

Mati 24. Te haamata-faahou-raa o te aereraa i nia i te ao nei. Genese 8:15-19; 9:1-2, 7-11.

Mati 31. Hi'opoaraa.



→→→→←←←←

Irava tamau aau: *Ioane 17:3*

Mati 3. TE OHIPA A TO'NA METUA. Luka 2:42-52; Ioane  
6:38-40; 17:1-3.

Mati 10. I TE MEDEBARA RA I IUDEA. Mataio 3; 4; 11:10; Mareko 1-3; Luka 3:2, 10-15; 7:18, 23-30; Ioane 1:35, 37.

Mati 17. MAI IUDEA I GALILEA. Ioane 2:1-11.

Mati 24. TE MAU TUPURAA MATAMUA I ROTO I TE OHIPA A IESU.  
Ioane 2:13-25; 3.

Mati 31. Na te orometua haapii e maiti i ta'na iho haapiiraa.

No te Ava'e MATI

Irava tamau aau: *Salamo 112:1-*

E ao to te taata i māta'u ia Iehova ra; tei riro roa to'na aaui i ta'na pa-  
raui.

MAHANA MAHA MATAMUA

# Te Mana o te Pure

Ua titau atura matou i te mau Initia ia haere mai no te tau-  
tururaa ia matou i te paturaa i te hoê aua tapea pape i roto  
i te hoê anavai ra ia tia ia matou ia faararirari i te hoê vahi  
fenua maitai.

No te reira tumu, haaputuputu maira ratou, mai te huru  
ra e toru ahuru fare tiaha, i to matou vahi parahiraa, eia-  
ha râ ma te anaanatae, no te mea ua mana'o ratou e, eita e  
maoro e mārô taua anavai ra no te mea ua iti te hiona i nia  
i te mou'a.

Ma te ohipa rahi faaoti atura matou i ta matou patu tapea pape e ua faararirari i ta matou mau faaapu i te hoê noa i-ho taime i te tau mahanahana o te matahiti 1856. I reira ore atura te pape e haamata atura ta matou mau faaapu i te oriorio.

I reira haere maira te mau Initia ia'u e parau maira, "Ua fafau mai oe ia matou e, mai te mea e tauturu matou i te paturaa i te aua tapea pape e ia tanu i te to papaa, e noaa ia ta



matou pape. Teihea'tura at oe fafauraa, inaha, ua mārô te pape i teie nei? Eaha ta matou e rave no te amuraa i te maa i teie tau toetoe i mua nei?

Ite atura to ratou raatira e, ua peapea roa to'u mana'o no te reira, parau maira oia ia'u, "Te vai nei to matou tahu'a raau; e tono vau ia'na i nia i te mou'a ia hamani i te raau no te ûa; area, ei raau puai mau e tano ai, area, o oe ra, a imi atoa i te ravea, peneia'e o te ûa mai, no te mea te mana'o nei au e, eita e ûa i roto i teie ava'e.

I te poipoiraa a'e, i te aahiata, ite atura vau i te auauahi a te tahu'a raau i te peeraa i nia, i te hiti o te mou'a tei parauhia te Mou'a Rahi, o te i'oa ia a te Initia o te vahi tei parauhia i teie nei, o te faa o te Mou'a Paina.

Tei rotopu vau i te tahi mau Initia, no reira faaatea'tura vau ia'u e pure atura vau i te Atua o Aberahama ia aroha mai ia'u mai te mea ua hape au i te parauraa i te mau Initia e, e roaa ta ratou pape no te faarariraa i ta ratou mau faaapu; e ia haamairi mai te ra'i i te ûa ia ore to matou manaraa i nia i te Initia ia ore.

E poipoi nehenehe roa taua poipoi ra, aita te hoê ata i nia i te ra'i, e a tuturi noa'i au topatapata maira te tahi mau topata ûa i nia i to'u tua. Ite atura vau e, e tapao ûa te reira e ua pahonohia mai ta'u pure. Faaite atura vau i te mau Initia e, e ûa te haere mai ra. E i to'u ho'iraa i to matou vahi parahiraa faaite atura vau i to'u mau taeae, e noaa ta matou pape mai te au i to matou hinaaro.

Ia poipoi faahou a'e haamata atura te hoê ûa mārû i te mairi mai, e aita i maoro tahe faahou atura te anavai mai tei mâtauhia, area, te vahi maere, e mea mâ roa taua pape ra. Faarari atura matou i ta matou mau faaapu mai te au i to matou hinaaro, e ua tiaturi te mau papaa, e te mau Initia atoa hoi e, e tautururaa te reira no te ra'i mai.

Ua mana'o vau e, aita â ta matou mau faaapu i hotu mai te reira i te rahi, mai te matamua mai â, e i te mau matahiti i muri mai atoa hoi.

#### MAHANA MAHA PITI

#### Ua Riro Te Re I Te Ohipa Maitai

E fare hamani'raa parahiraa ta to'u metua tane. E fare rahi, e ua rahi roa ta'na mau taata rave ohipa e te mau tamarii atoa hoi. Ua mâtau oia i te aufau i ta ratou moni mai te au i te ohipa i ravehia e ratou, oia hoi, na nia i te rahiraa o te mau parahiraa tei hamanihia e te taata hoê i te hopea o te hebedoma. Ia tae i te reira mahana e tamatahia te mau



parahiraa e e mea paari mau anei e ua hamani-maitai-hia anei. E mai te mea e, e mea maitai te parahiraa e aufauhia ia te taata, e a ore râ te tamarîi tei hamani i te reira.

I rotopu i te mau tamarîi o te rave ra i te ohipa na matou te vai ra e piti tei mau maitai to raua i'oa ia'u—o Rufus Loudes e o Henere Malin. E na tamarîi rave maitai raua i te ohipa e e mea varavara roa ta raua parahiraa i te patoia-hia.

I te hoê mahana ua hinaaro to'u metua tane i te maiti i te hoê paoti piti no te pae o te mau tamarîi. Area, na ô atura to'u metua tane, "Ua hinaaro vau i te hoê tamaiti te tia ia tiaturihia e te haapao maitai hoi."

Eaha ia to outou maua'o no te ravea ta'na i imi no te imiraa i te hoê? Ua haaputuputu atura oia i te mau tamarîi atoa i roto i te hoê piha rahi e faaite atura oia ia ratou e, aita e hi'opoaraa e tae noa'tu i te taime e faaitehia'tu ai; ia hamani râ te mau tamarîi i ta ratou mau parahiraa mai tei mâtauhia, e ia tae i te hopea o te hebedoma e aufauhia'i ta ratou moni mai te au i te ohipa i ravehia.

Mana'o ihora to'u metua tane e, i teie nei, e ite ia vau i te tamarîi o te hamani i te parahiraa no te moni ana'e te roaa ia ratou, e tei rave no te haamauruururaa i to ratou iho aau.

Ua faatano maitai to'u metua tane ta'na ohipa i ta'na i parau ra. Ite atura oia e, ua rahi a'e te parahiraa tei hamanihia i tei mâtauhia, e ua aufau iho â oia i ta ratou moni ma te tapea ore; area râ, ua tapao maitai oia i te mau parahiraa e ua faataahia i te reira na nia i te tamarîi hoê. E i te hopea o na hebedoma e toru ua hi'opoahia te taatoaraa o taua mau parahiraa ra.

Itehia'tura e, e mea maitai te taatoaraa o te mau parahiraa o Rufus Loudes e aita noa'e i hau atu te rahiraa i tei mâtauhia, area, e mea rave paarihia ana'e ratou. Te afa râ o te mau parahiraa o Henere Malin, parari atura i te tamaraa matamua, e ua na reira atoa te mau parahiraa o te tahi mau tamarîi ra. Parau atura to'u metua tane, "Ah, i teie nei, o Rufus ia to'u taata."

No reira, a rave maitai noa ta outou mau ohipa noa'tu e, aita e taata no te hi'o ia outou, maori râ o to outou aau, e na te reira e faatupu i te faatura e te tiaturi o vetahi ê, e te mauruuru o te Atua—te ohipa te horoa mai i te rê.



## MAHANA MAHA TORU

## E Oraraa Maere

I te hoê o to matou aroraa i te mau Initia, ua roohia ihora to ratou puhaparaa e matou. I to'u iteraa i te mau vahine e te mau tamarii i te hororaa, ma te tiaa ore, no te faaorara ia ratou, ma te vaiiho i te toto i nia i te hiona e te mau ofai, opua ihora vau i roto ia'u iho e, mai te mea e ohipa faahou ta'u e te mau Initia, e mea ê ia ta'u raveraa ia ratou.

Aita vau i hinaaro i te haapepe i tera mau vahine e te mau tamarii, area râ, no to'u faarooraa e, tei reira o "Ruau Avae Rahi", ua mana'o ihora vau e, e mea tia ia pohe oia, no reira aita i maoro ite atura vau i to'na mau tapao e tapapa ihora vau ia'na. No te rahi o te hiona i nia i te fenua ua ite-ohie-noa-hia to'na mau tapao. Haere atura vau na nia i te tahi nau aivi e i to'u haafatataraa i te hoê tumu raau rahi, tei pupuru e tei haehaa roa to'na rau, tae maira te ite ia'u e, eiaha e haafatata faahou atu. Haere atura vau i te tahi mai pae na raro a'e i te hoê tafareraa o te aivi. E i to'u taeraa i te tahi pae, inaha, ua ore te mau tapao. Ho'i atura vau i muri a hi'o noa mai ai te mau Initia e tae noa'tu i te taime ua moe roa vau ia ratou.

I muri a'e, a tamata'i matou i te faatupu i te hau i te mau Initia, ua parau mai o "Ruau Avae Rahi" e, ua opua oia, e te tahi atu â mau Initia, i te taparahi ia'u, ta'n vahine e ta maua tamarii i te tau mahanahana i mairi ra, i roto i te hoê faa ra, ahiri matou i taoto i reira. E i taua taime a parauraa ra ua na ô atoa mai oia e, a papai ai oia i ta'na te'a, "Ahiri oe, i te tau a auau ai oe ia'u i roto i te mau mou'a ra, i tapiri rii noa mai i te tumu raau ta'u e parahi ra, ua te'a ia vau ia oe i teie nei te'a e tae noa'tu e û te huruhuru i nia i to tino."

Haamauruuru atura vau i te Fatu, mai te au i to'u mana'o, no to'na heheuraa mai i to'na varua.

## MAHANA MAHA HOPEA

## TE AAMU NO TE LILI O TE PEHO

Te vai nei te hoê aamu iti tei faaite mai e, te vai ra te hoê monahi tei parauhia o taeae Benedict, e e faaapu tiare nehe-nehe roa ta'na. I te hoê mahana haponu atura te tahi taata ia'na te hoê puohu aa e te hoê maa parau iti tei na ô mai e, "Tera mai te tahi puohu aa tei tupu noa i to matou nei vahi, area, aita roa te reira i te vahi ta oe e parahi na. E mau aa te reira no te hoê lili tei horoa mai i te tiare nehenehe e te



nainai hoi. Noa'tu i to ratou nehenehe, e tiare itoitro roa e e tupu noa oia mai te aihere te huru. E tiare noanoa to'na e to ratou huru ra, e au ia i te mau oe rii tei tautau i nia i te tumu e ua parau te mau tamarii e, "O Te E'a e tae atu ai i te Ra'i."

Te mana'o matamua tei tupu i roto ia taeae Benedict, o te tanu ia te reira i roto i ta'na aua tiare, tei vai i roto i te aua o te fare Monahi, area, parau atura oia, "Ia rave ê atu te Atua i taua mana'o popore i roto i ta'u aau nei, ia riro te reira na te mau tamarii, eiaha ra na'u."

Rave atura oia i taua mau aa ra e te hoê ope e haere atura i roto i te uru raau e tanu atura i te reira i te hoê vahi tei faahaumihia e te hoê anavai iti pape ra. A tere noa'i te tau reva'tura o taeae Benedict i te vahi i faataahia, mou roa'tura ta'na faaapu tiare, e riro atura te fare Monahi ei mea no te mau tau i mairi ra. Area, te mau Lili o te Peho ra i roto i te uru raau ra, tupu atura e parare roa'tura i te mau vahi atoa. E ia tae te haamataraa o te mau tau mahanahana, i te mau matahiti atoa, ia haaputuputu te mau tamarii no te pafairaa i taua tiare iti noanoa ra, e parau ratou e, "O te tiare te reira a taeae Benedict", area e parau faahou ratou e, to'na i'oa mau ra, "O Te E'a e tae atu ai i te Ra'i."

### NA TE MAU HAAPII HAHAEERE NA TE MAU UTUAFARE

(E tuatiraa no te apî 23)

fatata nei te varua faatura ore; tei faaî i te ao atoa nei, i te ô i rotopu ia tatou. Eiaha roa te reira ia tupu! Ua horoahia mai ia tatou teite e te maramarama rahi, no ô mai i te Atua, no reira, ia haehaa tatou, e ia faatura tatou e tia'i. Ia riro tatou ei hi'oraa maitai no ta tatou mau tamarii, e ia haapii tatou ia ratou i te faatura i te mau mea mo'a atoa i te ao nei e i te ao atoa ra.

Ia faatura tatou i te mau fare pureraa, e te mau fare putuputuraa. Ua tomohia ia no te ohipa a te Atua. Ia faatura atoa tatou i te mau oro'a e te mau haapiiraa mo'a, e te mau tavini atoa no te Atua. Ia ore râ tatou ia faatura, e tapao ia no to tatou faaroo iti, e te mana'o maitai ore, e te mauruuru ore. E mea ino a'e te mau mea e tupu i te reira. No reira, ia haapao maitai tatou ia tatou iho, ia faatura tatou i te mau mea varua e te mo'a atoa.



E te tahi atu â mea ta Iesu i faaite atu i te taata ona ei ravea na'na ra ia noaa te ora mure ore, te faatura'tu ia i to'na metua tane e to'na metua vahine.

E teie faaueraa mo'a no te Atua mai ia tatou, ei titaauraa ia ia tauturu noa â te mau tamarii atoa, ma te aroha e te here, i to ratou mau metua i te mau taime atoa, e tae noa'tu i to ratou poheraa.

*Papahia e Nile, N. R. Chugg*

## E E Tama'i Tei Nia I Te Ra'i

Ua ite Ioane i roto i te hoê orama i te tahi mau hohoa ohipa tei ravehia hou te taata nei i hamanihia'i. Ua ite atoa oia i te peapea i rotopu i te mau melahi, oia hoi i ropu i te nuu o Mihaela e te nuu o Satane.

E tai'o tatou: *E e tama'i tei nia i te ra'i: o Mihaela e ta'na ra mau melahi tama'i atura i te teni; e ua tama'i maira te teni e ta'na ra mau melahi.* (Apokalupo 12:7)

I teie tama'i i ropu i teie feia tino varua, ua hau te tahi pae i te tahi. Ua pee atura te toru o te tufaa na muri a'e ia Satane; o tei faaaupia mai te mau fetia o te ra'i. Ua tauturu te rahiraa o taua feia ra ia Mihaela, e a ore râ, ua faaea noa ratou ma te patoi ore. Na roto i te reira i haapaohia'i te tumu o to ratou nohoraa matamua. Area râ, te mau varua o tei haere i te pae o Satane, aita ratou i haapao i to ratou nohoraa matamua, no reira, aita i noaa ia ratou te nohoraa piti.

Ua riro te rê ia Mihaela e ta'na mau melahi; e Satane, e a ore râ o Eilela, te tamaiti o te po'ipo'i i te matamua ra, ua tiavaruhia i rapae i te ra'i ra, oia ia, *i hurihia i rapae i nia iho i te fenua nei, e ta'na mau melahi atoa ua huri-atoa-hia i rapae.* (Apokalupo 12:9)

Te faaite mai nei te peropheta ra o Isaia, o tei farii teie mau mea na roto i te heheuraa, i te huru o te toparaa o Satane: *O to oe hoi mairi mai te ra'i, e Eilela, e te tamaiti o te poi-poi e! o to oe hoi tâpûraahia i raro i te repo, e tei haavîvî i te mau fenua nei e! Ua parau ra oe i roto i to aau ra e, E haere au i nia roa i te ra'i ra; e faateitei au i tau terono i nia'e i te mau fetia o te Atua ra; e parahi hoi au i nia i te mou'a amuiraa ra, i te pae i apatoa ra: e a'e â vau i nia'e i te mau ata ra; e ia faito vau i Tei Teiteira. E hopoi-roa-hia râ oe i raro roa i te tanuraa ra, i te hiti roa o te apoo ra.* Isaia 14:10-15.



## E Faatura'tu I To Mau Metua

*F* FAATURA'TU i to metua tane, e to metua vahine, ia haamaorohia to oe pue mahana i te fenua ta to Atua, ta Iehova, e horoa no oe na. Te hoê ture teie na tatou, oia hoi, ia faatura'tu i to tatou mau metua. E mai te mea e, e haapao tatou i te reira, e fariihia e tatou te utu'a, oia hoi, e haamaorohia to tatou pue mahana i te fenua nei. E ere teie faaueraa no te pae varua ana'e, no te pae tino atoa hoi. A faatura'tu i to tatou Metua Hau e te mau taata atoa o te faatere mai nei ia tatou. Ia vai noa â te hau e te peapea ore i roto i to tatou mau utuafare e to tatou fenua hoi.

I to Iesu matahiti e hoê ahuru ma piti, ua ite oia i ta'na ohipa i faataahia na'na ra, noa'tura i to'na iteraa i te reira, aita râ oia i ore i te faatura'tu i to'na na metua, ua vaiiho oia i ta'na ohipa i roto i te hiero e ua ho'i oia i Nazareta ra, ma te parau e, "Eaha orua i imi mai ai ia'u? Aita orua i ite, e ia haapao vau i ta ta'u metua e tia'i?"

Na roto mai i te mau parau paari o tei roto i te Bibilia, te vai nei te tahi mau parau e au i ta tatou mau tamarii.

Ua parau atura Solomona, te hoê peropheta paari, i teie mau parau na te mau tamarii atoa: "E faaroo mai to metua tane i fanau ai oe ra, e eiaha e vahavaha i to metua vahine ia ruhiruhi ra."

"Te tamaiti maamaa ra e otoraa ia na ta'na metua tane, e te ati no tei fanau mai ia'na ra."

"E mau maitai, e tau tamaiti, i te parau o te metua vahine, e tapea tamau maite i te reira i roto i to aau: e haafifi maite i te reira i nia i to a'i. Ia haere oe ra, na'na oe e tia, eia ara oe ra, na'na e paraparau mai ia oe. E lamepa hoi te ture, e tiarama hoi te a'o; e te haapiiraa e faaitoitoraa o te e'a ora ia."

Ua faauehia to Ephesia e Paulo ra e, "E faaroo i to outou mau metua i te Fatu ra, e parau-tia hoi te reira, e faatura'tu i to metua tane e to metua vahine; o te ture mata-mua ia i pahonohia i te maitai i faaitehia mai, ia maitai hoi oe, e ia maoro te parahiraa i te ao nei."



No te aha teie tama'i i faatupuhia'i i te ra'i ra? No te mea ua hinaaro Eilela i te faateitei ia'na iho, ma te haamana'o-ore-raa i te tahi.

I roto i te Buka Poe Tao'a Rahi e ite ai tatou i te huru o te parau a te Atua ia Mose. Te faaite mai nei taua parau ra, i pihai iho Satane i te Atua i te matamua. Ua haere Satane i mua i te aro o te Atua, e ua ani oia i te Atua ia tono ia'na i te ao nei, e e faaora oia i te mau taata atoa, e eita te hoê e moe. Ua ani oia i te hanahana o te Atua, no te reira ohipa. Area, ua tae te Tamaiti a te Atua, oia hoi, o Iesu Mesia, e ua ani atoa Oia i te Atua ia tono ia'na i te ao nei; e haapao hoi te Atua i 'To'na iho hinaaro, e Na'na hoi te hanahana no te mau ohipa e ravehia. No reira, ua orure Satane e ua tiavaruhia ihora oia i rapae e te mana o Iesu Mesia, e ua riro Satane, oia ia, te diabololo, te metua o te mau haavare, ia haavare e ia haamatapo i te taata nei, ia faatitî ia ratou o te ore e faaroo i te parau a te Atua ra.

Tei ia tatou nei te maitiraa, o vai ta tatou i hinaaro i te pee.

*Papathia e Farani, F. D. Sanford*

#### PARAU API NO TE MISI

#### PARAU FAAITE

Te faaitehia'tu nei e, e faatiahia te Amuiraa Eperera, no te Ekalesia a Iesu Mesia i te Feia Mo'a i te Mau Mahana Hopea Nei, i te mau Amaa i Vahitahi, Hikueru, Nihiru, Takaroa, Rakara, Papeete e i Tubuai.

I te 3 no Tenuare i mairi a'enei ua faarue na orometua ra o Teremera, D. W. Braegger, raua o Melavina, M. D. Christensen, i Papeete no te haere atu i te vahi raveraa ohipa apî i faataahia na raua, oia hoi, i Katiu, Tuamotu.

Ua reva atoa na orometua ra o Horate, H. G. Wilde, raua o Viliamu, W. R. Young, no te haere atu i Moorea.

I roto i te ava'e no Tenuare i mairi a'enei ua tae atoa mai, i Papeete nei, o Varoa â Ganahoa raua o Tuhiva â Makitua no te Amaa i Tauere mai e ua faaite mai raua e, e mea maitai roa te ohipa a te Fatu i reira.

Ua tae atoa mai o Tahauri â Turoa, no te Amaa i Takaroa, i Papeete nei e ua faaite atoa mai oia e, e mea maitai roa te ohipa a te Fatu i reira.

Te faaineine nei te mau Orometua ia ratou iho no te haereraa i te mau vahi i faataahia no ratou no te raveraa i ta ratou mau ohipa, i muri a'e i te hoê haaputuputuraa maitai roa ta ratou i faatupu i Papeete nei.

Te reva nei to tatou hoa orometua o Haurata, H. A. Heusser i to'na fenua ai'a i muri a'e i to'na raveraa ita'na ohipa, ma te itoito, i rotou ia tatou nei i na matahiti e 2 e 10 ava'e.



PARAU API ORO'A

## FAATOROARAA

| I'OA                   | TOROA   | MAH. FAAT. | AMAA    | NA VAI I FAATOROA    |
|------------------------|---------|------------|---------|----------------------|
| Tanetupuhoe â Tamatoa  | Haapii  | 17-9-39    | Marokau | Re McEntire          |
| Tupuhoe Hoga â Kuranui | Diakono | 3-9-39     | Marokau | Rutena Allred        |
| Tanetupuhoe â Tamatoa  | Peresi. | 1-10-39    | Marokau | Rutena Allred        |
| Maihea Enoha â Kuranui | Tahu'a  | 6-10-39    | Marokau | Teremera<br>Braegger |
| Tupuhoe Hoga â Kuranui | Haapii  | 6-10-39    | Marokau | Maihea â<br>Kuranui  |
| Maro â Tohitika        | Peresi. | 1-10-39    | Marokau | Re McEntire          |

## BAPETIZORAA

| I'OA                   | MAT. | MAH. BAP. | FENUA   | NA VAI I BAPETIZO    |
|------------------------|------|-----------|---------|----------------------|
| Tehetu Mohea â Papanui | 18   | 22-10-39  | Marokau | Teremera<br>Braegger |
| Tuhiata â Teanuanua    | 8    | 10-12-39  | Papeete | Mokio â Maire        |

## FANAURAA

Tevahineheipua Tearo â Teahinui, v., 9-10-39, Marokau; m. t. Teahinui  
â Kuranui, m. v. Tamahau â Huri.

O NOTEAHA E O NOTEMEA

E paraparauraa iti teie o tei tupu i rotopu ia Noteaha raua o Notemea no  
nia i te mârôraa i tupu i rotopu ia Nato e ia Oura, i teie ava'e i mairi a'enci.

Te parau ra o Noteaha ia Notemea e, ua hape Nato i te parauraa e aita  
e poiri hau a'e mai to Oura.

Te pahono nei Notemea e, ua tano roa - no te mea aita roa e ravea no te  
haamaramarama i te upoo o Oura.

Te parau ra Noteaha e, no te aha ra Oura e na reira'i?

Te pahono nei Notemea e - no te mea aore iho â e roro o te upoo o Oura  
ahiri e roro ra, e feruri ia, e ite ia, e e farii ia Oura i ta te parau-tia e ta te  
ohipa-tia. Mai te parau atoa'tu Notemea ia Noteaha e, ahiri hoi e roro to  
te upoo o Oura, eita atoa ia oia e mau ohie noa i te here ta niau.

Parau atura Noteaha ia Notemea, e tamata i te a'o e i te haamaramara  
ma ia Oura.



Pahono atura Notemea e, aita e ravea no te mea ua tamata, e ua tamatahia a'enei, e aita Oura e farii i te mea tia.

Ua parau, e ua parau faahouhia Oura e, e ara i te taipu, i te auri e i te here, e mea faufaa ore te parau.

Ua ite a'enei â Oura i te hape o to'na feruriraa e ua ite faahou â tatou i te hape faahou o Oura - eita â e faaroo.

Ia parauhia e ia faaarahia Oura e, eiaha e farii e eiaha e vare i tera e i tera parau - e vare e e farii noa â Oura, noa'tu te ino, te ati e te faufaa ore.

Parau atura Noteaha ia Notemea e, eaha ia te ravea no Oura?

Pahono atura Notemea e, atira te haamau'a i to taua taime, i ta taua parau e i to taua vaha. E rau a'enei to Oura atiraa, e e ati â oia. No reira, e vaiiho noa'tu ia'na ia vai Oura noa na e ia mairi noa Oura i nia i te ati.

E mai te huru ra e, ua haapaohia iho â o Oura no te roro ore, no te ramarama ore e no te amu.

E au ia i te feia mana'o etaeta no nia i te mau mea hape atoa e no nia i teie tama'i.

E e parau mau iho â teie, inaha, te haamata ra te mau oura purutia atoa i te farerei i to ratou hape tapirihia i te ati na roto i to ratou ara ore, na roto i to ratou vare hape ia Hitler.

I na matahiti a'enei ua a'o atu te mau nato i te mau oura e, e ara mai-tai - aita ana'e i haapao mai i te parau e i te mea tia.

Parau atura Noteaha ia Notemea e: eaha atura to ratou huru i teie nei?

Pahono atura Notemea e: ua mairihia Oura ma i te tapu ati e ua haamata hoi to ratou arero i te toro.

## RURU

### TE TAMA'I RUTIA IA FINALANE

Ua tupu atoa i teie mau mahana i mairi a'enei tetahi atu tama'i i rotopu i te Rutia e te Finilane.

Te tumu o te reira tama'i, hoê â ia e te tumu o te tama'i Purutia e Polane i roto i te ava'e Setepa i mairi a'enei.

E tana tumu ra, o te mana'o nanao fenua e te hinaaro faao a Rutia i te faatereraa Communiste na te mau vahi atoa.

Mai ta Purutia i hinaaro atoa e ueue i te faatereraa Nazi a Hitler na te mau vahi atoa.

Te faatereraa Nazi a Hitler, o te faatereraa faatîti nunaa ia.

Te fuatereraa Communiste a Rutia, o te faatereraa haru faufaa ia a te nunaa rii e a te feia faufaa.

O Purutia e o Rutia na Basileia i opua tahito mai i te huru e tupu nei i teie taime.



E ta raua atoa ravea o te haavî, o te aā e o te haamāta'u i te mau Basileia nainai e i te mau Basileia rarahi.

Ua manuia ta Purutia na reiraraa i te Basileia Autiritia e Tcheco—o Polane tei ore i vî e o tei farii i te ati tama'i e tae noa'tu ra i te upootiaraa o te puai i nia i te paruparu.

Ua manuia ta Rutia na reiraraa i na Basileia rii nainai o Esetonia, Lavia e o Lituania. Ua farii ana'e teie mau Hau rii no ta ratou ravea ore.

I te tamataraa râ Rutia ia Finilane, ua farerei Rutia i te patoi a taua nuaa ra o tei feruri, mai te nunaa Polone, e mea maitai a'e te aro pohe atu ai i te ati e farereihia i te faatereraa ino e te teiaha rahi.

No reira hoi ua tuu Rutia i to'na nuu rahi faito huehue ia tupai i te nuu iti Finilane. Ua tomo te nuu Rutia i roto mai i te otia Finilane mai te farerei hoi i te u'ana o te aro patoi a te Finilane.

Ua ahuru e tiahapa mahana i teie nei te aroraa e ua maere roa e ua hitimaue roa te Rutia i te itoitoo taa e te tiaturi-ore-hia o te faehau e o te huiraaatira Finilane.

E na roto i te mau parau i roaa mai i teie mau mahana—aita re'a api e roaa râ i te Rutia e ua 25,000 faehau rutia i pohe e tei pepe—ua 9,000 faehau rutia i roaa ora i te Finilane—ua hau atu i te 100 te tank rutia i hu'a-hu'a e tei roaa i te Finilane e ua hau atu i te 30 te manureva rutia i perehu i te Finilane.

E parau mau â ia, e te pohepohe e te pepe atoa ra te Finilane—e ere râ e na ratou i opua e, e tama'i.

E na roto i to Rutia hararaa i tera ohipa tia ore—ua hairiiri roa to te ao nei feia maramarama e te tiamâ i te faatereraa Commuiste mai te hairiiri i tupu atoa i te faatereraa Nazi a Hitler.

I teie mau matahiti i mairi a'enei ua orero te vaha o Hitler e o Staline, na upoo o Purutia e o Rutia i te mau parau e te mau faataaraa maitai puhiairoto.

Ua farii vetahi i taua mau huru ra mai te vare maite- e i teie nei ua tupu te tatarahapa e te haama rahi i nia ia ratou.

Na tera mau huru mehameha rahi e haapapu roa i te mau nunaa atoa o te ao nei e aore mau—e aita mau e faatereraa i hau a'e i te afaro e i te maitai, maori râ ia, te faatereraa Repupirita; oia hoi, te faatereraa mana huiraaatira mai ta Farani.

Ia upootia mau â te mau Basileia tei reira te faatereraa oraraa hau, te reira faatereraa fanao mai ta tatou atoa e fanao nei, e mai ta to tatou mau tamarii atoa e fanao atoa.

RURU

---

*Te hoo: e 5 farane i te matahiti; e 10 fr. no na matahiti e 3*

---

Neneihia i roto i te Piha Neneiraa a te Ekalesia a Iesu Mesia I Te Feia Mo'a i Te Mau Mahana Hopea Nei. Papeete, Tahiti.

---

Marcel Bonnet Gérant. K. R. Stevens, Imprimeur. Uel C. Hunting, Editeur.  
Rue Dumont d'Urville, Orovini, Papeete, Tahiti.